


齊東野語

三



齊東野語

(三)

周密撰

齊東野語卷十一

黃德潤先見

黃洽德潤事阜陵爲臺諫。執政未嘗有大建明。或譏其循默。淳熙末。上將內禪。一日朝退。留二府賜坐。從容諭及倦勤之意。諸公交贊。公獨無語。上顧曰。卿以爲何如。對曰。皇太子聖德誠克負荷。顧李氏不足母天下。宜留聖慮。上愕然色變。公徐奏。陛下問臣。臣不敢自默。然臣旣出此語。自今不復得覲清光。陛下異日思臣之語。欲復見臣。亦不可得矣。退卽求去甚力。以大資政知潭州。後壽皇在重華宮。每撫几嘆曰。悔不用黃洽之言。或至淚下。

譜牒難考

歐公著族譜。號爲精密。其言詢生通。自通三世生琮。爲吉州刺史。當唐末黃巢陷州縣。率州民捍賊。鄉里賴以保全。琮以下譜亡。自琮八世生萬。爲安福令。公爲安福九世孫。以是考之。詢在唐初。至黃巢時。幾三百年。僅得五世。琮在唐末。至宋仁宗纔百四十五年。乃爲十六世。恐無是理。後世譜牒散亡。其難考如此。歐陽氏無他族。其源流甚明。尙爾矧他姓邪。

滕茂實

滕茂實字秀穎。吳人。國史作杭州人初名禪。登政和第。徽宗改賜今名。靖康初以太學正兼明堂司令。與路允迪

宋彥通奉使金國。割三鎮太原。尋奉密詔。據城不下。金人怒之。囚於雲中。淵聖北遷。茂實冠裳迎謁。拜伏號泣。請侍舊主俱行。不從。且誘之曰。國破主遷。所以留公者。蓋將大用。遂留之鴈門。先是自分必死。遂囑友人董誥。以奉使黃旛裹屍而葬。且大書九篆字云。宋使者東陽滕茂實墓。復作詩自敘云。茂實奉使無狀。不復返父母之邦。所當從其主以全臣節。或怒而與之死。幸以所杖旛裹其屍。及以所篆九字刊之石。埋之臺山寺下。不必封樹。蓋昔年病中嘗夢遊清涼境界。覺而病愈。恐亦前緣。今預作哀辭。幾於不達。方之淵明。則不可。若蘇屬國牧羊海上。而五言之作。始敢援此例云。詩曰。蠶鹽老書生。繆列王都官。索米了無補。從事敢辭難。殊憐復盟好。仗節來榆關。城守久不下。川途望漫漫。儉輩果不惜。一往何當還。牧羊困蘇武。假道拘張騫。流離念窮東。坐閱四序遷。同來悉已歸。我獨留塞垣。形影自相弔。國破家亦殘。呼天竟不聞。痛甚傷肺肝。相逢老兄弟。悼嘆安得歡。波瀾卷大廈。一木難求安。就不違我心。渠不汗我顏。昔燕破齊王。羣臣望風奔。王蠋獨守節。齊人有甘言。經首自絕脰。感慨今昔聞。未嘗食齊祿。徒以老爲民。況我祿數世。一死何足論。遠或沒江海。近或死朝昏。斂我不須衣。裹屍以黃旛。題作宋臣墓。篆字當深刊。我室年尚少。兒女皆童頑。四海無置錐。飄流倍悲酸。誰當給衣食。使不厄飢寒。歲時一酹我。猶足慰我魂。我魂亦悠悠。異鄉寄沉冤。他時風雨夜。草木號空山。後竟以憂憤成疾殂。北人哀其忠。爲之起墓鴈門山。歲時致祭焉。所記張浮休之弟確。嘗爲烏延帥幕。獨不廷謁。童貫及徽宗本以五月五日生。以俗忌。移之十月十日。皆可以補史闕。後董誥自拔歸南。上所爲詩。贈直龍圖閣。國史雖有本傳。甚略。且無其詩并敘。與此亦

少異。余訪之北方紀錄，得其實焉。

何宏中

何宏中，字廷遠，先世居鴈門。父子寄守武州宣寧尉，歿王事。宏中宣和元年武舉，廷對第二名，調滑州章城尉。汴京被圍，獨韋城不下，後爲河東河北兩路統制，接應副使。武漢英守銀冶路，立山寨七十四所，漢英戰死。宏中堅守，以糧盡被擒，金人憐其忠，授之以官。廷遠投牒於地曰：「我嘗以此物誘人出死力，若輩乃欲以此嚇我邪？」囚西京獄，久之，免爲黃冠。自號通理先生，起紫微殿，遷徽宗東華君御容以事之。所著有成真通理二集。正隆四年病歿，臨終有詩云：「馬革盛屍每恨遲，西山餓死亦何辭。姓名不到中興歷，自有皇天后土知。」其志亦可哀矣。國史乃失其傳焉。

姚孝錫

姚孝錫，字仲純，豐縣人。登宣和六年第，調代州兵曹。金人寇鴈門，州將恆怯議降，孝錫竟投牀大斲，不與其議。既得脫去，遂往五臺，薄移疾不仕，因家焉。時年三十九，治生積粟至數萬石，遇饑歲盡出以賑貧乏。鄉人德之，所居正據五臺之勝，亭榭數十座，花竹百畝，中歲盡以家事付諸子。日與賓朋放浪山水，詩酒間自號醉軒。至八十三乃終，有集號雞肋。有題滕茂實祠云：「本期蘇鄭共揚鑣，不意芝蘭失後凋。遺老祗今猶涕淚，後生無復識風標。」西陲鴈度霜前塞，水淖樵爭日暮橋。追想平生英偉魄，凌雲一笑豈能招。七言如節物後先南北異，人情冷暖古今同。久客交情諳冷暖，衰年病骨識陰晴。」元（按津逮本作玄）晏暮年常抱

病子山終日苦思歸。深林有獸鳥先噪。廢圃無人泉自流。食貧豈復甘秦炙。客病空懷奏楚音。五言如岸漲魚吹沫。山空石轉雷谷虛。生地賴境寂散天香。皆佳句也。

蜀娼詞

蜀娼類能文。蓋薛濤之遺風也。放翁客自蜀挾一妓歸。蓄之別室。率數日一往。偶以病少疎。妓頗疑之。客作詞自解。妓卽韻答之云。說盟說誓。說情說意。動便春愁滿紙。多應念得脫空經。是那箇先生教底。不茶不飯。不言不語。一味供他憔悴。相思已是不曾閑。又那得工夫呪你。或謗翁嘗挾蜀尼以歸。卽此也。又傳一蜀妓述送行詞云。欲寄意。渾無所有。折盡市橋官柳。看君著上征衫。又相將放船楚江口。後會不知何日。又是男兒。休要鎮長相守。苟富貴。無相忘。若相忘。有如此酒。亦可喜也。

檉木

杜詩乞檉木詩無音。或讀作豈。而韻書亦無此字。集中又有檉林礙日吟風葉。鄭氏註曰。五來反。若然。當作獸字。余嘗見陳體仁端明云。見前輩讀若獸韻。頗以爲疑。後見劔南詩有著書增木品。搜句覓檉栽。又荆公詩云。濯錦江邊木有檉。小園封植佇華滋。益信獸音爲然。檉惟蜀有之。不才木也。或謂卽榕云。

辦章

毛詩采菽平平左右。毛氏傳曰。平平。辦治也。正義云。堯典平章百姓。書傳作辦章。則平辦義通。讀詩記引荀子云。分不亂於上。能不窮於下。治辦之極也。詩云平平左右。今考書傳不見辦章事。史記作便章。徐廣

云。下云便程。則訓平爲便也。駟按尙書並作平字。索隱云。古文尙書作平字。此文蓋讀平爲浦庚切。平既訓辦。遂爲辦章。鄒誕生本亦同。漢以伏生書爲今文。安國書爲古文。堯典今古文皆有之。而作辦章者。今文也。特未知詩疏所授書傳爲誰作耳。昌黎袁氏先廟碑亦云贊辦章。

曹泳

紹興乙亥十月二十二日。秦檜亡。翼日。曹泳勒停。安置新州。先是二十一日。車駕幸檜第視疾。時已不能言。懷中出一劄。乞以燭代輔政。上視之無語。旣出。呼幹辦府問何人爲此。則答以曹泳。遂有是命。泳初竄名軍中。並緣功賞。列得班行。嘗監黃崑酒稅。秩滿到部。注某闕鈔上省。檜押勅。顧見泳姓名。問何處人。省吏對此吏部擬注。不知也。命於侍右書鋪物色。召見之。熟視曰。公檜恩家也。泳恍然不知所答。則又曰。公忘之邪。泳曰。昏忘實不省於何處。遭遇太師。檜入室有頃。取小冊示泳。使觀之。首尾不記他事。但有字一行曰。某年月日。某人錢五千。曹泳秀才絹二疋。蓋微時索遊富人家。得錢五千。求益不可。泳時爲館客。探囊中得二縑。曰。此吾束修之餘也。今舉以遺子。旣別。不相聞。雖知檜貴震天下。不謂其卽秦秀才也。泳曰。不意太師乃能記憶微賤如此。檜曰。公眞長者。命其子孫出拜之。俾以上書易文資。驟用之。至戶部侍郎。知臨安府。與謝伋嘗有隙。台州之獄。泳有力焉。檜暮年頗有異志。泳實預其密謀。檜本檜妻黨王氏子。蠢騃。嘗燕親賓。優者進妓。燭於座中。大笑絕倒。檜殊不懌。檜素畏內。妾嘗孕。逐之。生子爲仙遊林氏。子曰一飛。以檜故仕至侍郎。兼給事中。其兄一鳴。弟一鶚。皆位朝列。泳嘗勸檜還一飛。以補燭處。未果而檜死云。

此事聞之謝伋之孫直中興遺史所載則曹筠也。與此頗有異同。故詳載之。

朱漢章本末

紹興三十三年六月十一日。內禪。前一日。宰相朱倬罷。倬字漢章。三山人。登宣和第。或謂張浚囑薦之。非也。其實因劉貴妃以進。妃北人流寓閩中。有殊色。中貴人掌神御者。圖上其貌。久之不省。始歸西外之宗家。它日上見圖。悅之。命召入。遂有寵。其父懋。後至節度使。倬居鄉里。識之。夤緣締交。後爲學官。請外得舒州。將陛辭。刺知上燕閑所觀史傳。於奏疏中道之。大稱旨。留爲郎。不數年爲中司。遂至宰相。最惡王十朋。其在臺。嘗風陳丞相康伯去之。陳以告汪聖錫。汪曰。彼爲中司。胡不自擊之。陳曰。畏公議也。汪曰。彼且畏公議。相公獨不畏公議乎。旣而十朋不自安。請外。將予郡。倬又曰。顛人如何作郡。乃得外。大宗丞公論大喧。然上眷殊厚。辛巳。視師回。至平江。洪遵。岩爲守。時倬與康伯並相。遵以求入爲禱。倬唯唯。康伯曰。進退近臣。當由上意。非某所敢知也。及將內禪。康伯奏書詔方冗。翰苑獨員。洪遵在近。欲召之。倬惡其非出己。卽曰。不可。其弟邁。新爲右史。今復召遵。此蘇軾與轍所以變亂元祐也。上卒召遵副端。張震眞父爲同列。言上方行堯舜之事。此人豈可輔初政。不去之。必爲天下患。遂力攻之。上初不聽。時競傳覃霑在學生員皆免解。倬子端厚嘗肄業。旣蔭補矣。頗欲並緣在學人例竄名其間。眞父廉得其事。疏中言之。上始怒。遂罷相。景岩適當制。有云。爲名子邦家之基。曾未聞於成效。有元良天下之本。乃欲冀於疇庸。時眞父疏不付出。內外迄莫知其所坐。雖倬亦自疑懼。惴惴累年。汪公帥閩。至郡。方欲謁之。一夕暴下卒。國史本

傳乃謂高宗有內禪意。倬請徐之。及孝宗卽位。諫臣以爲言。以憂懼卒。或以爲服藥而殂。皆不然也。

陸務觀得罪

陸務觀以史師垣薦。賜第。孝宗一日內宴。史與曾觀皆預焉。酒酣。一內人以帕子從。曾乞詞。時德壽宮有內人與掌果子者交涉。方付有司治之。觀因謝不敢曰。獨不聞德壽宮有公事乎。遂已。它日史偶爲務觀道之。務觀以告張蕤子宮。張時在政府。翼日奏陛下新嗣服。豈宜與臣下燕狎如此。上媿問曰。卿得之誰曰。臣得之陸游。游得之史浩。上由是惡游。未幾去國。

蘇師旦麻

蘇師旦將建節。學士顏敏莫子純皆莫肯當制。易祓彥章爲樞密院檢詳文字。師旦爲都承旨。祓與之昵。欣然願任責。遂以國子司業兼兩制。竟爲師旦草麻。極其諛佞。至用前人舊對。所爲有文事。有武備。無智名。無勇功者。蓋以孔子比之。子房不足道也。旣宣布。物論譁然。亟擢祓左司諫。諸生爲之語曰。陽城毀蜚延齡之麻。由諫官而下。遷於司業。易祓草蘇師旦之制。由司業而上。擢於諫官。旣而韓誅。蘇得罪。祓遂遠貶。

雷變免相

乾道丁亥十一月二日冬至郊祀。有風雷之變。宰相葉顥。魏杞皆策顥。先是會慶節。金國使在庭時受誓戒矣。議者欲權免上壽。就館錫宴。廟堂姑息。不能主其議。宴集英如常。天變豈偶然哉。洪邁當制有曰。理

陰陽而遂萬物。所嗟論道之非。因災異而策三公。實負在天之愧。蓋有所風也。

高宗立儲

孝宗與恩平郡王璵同養於宮中。孝宗英睿夙成。秦檜憚之。憲聖后亦主璵。高宗聖意雖有所向。猶未堅決。嘗各賜宮女十人。史丞相浩時爲普安府教授。卽爲王言上以試王。當謹奉之。王亦以爲然。閱數日。果皆召入。恩平（按津逮本有十八二字）皆犯之矣。普安者。完壁也。（按津逮本無此六字）已而皆竟賜焉。上意遂定。

慈孝李后

慈孝李皇后。安陽人。父道本。戚方諸將。故羣盜也。后天姿悍妬。旣正椒房。稍自恣。始成肅。謝后事。高宗及憲懿聖甚謹。至后頗偃蹇。或乘肩輿直至內殿。成肅以爲言。后恚曰。我是官家結髮夫妻。蓋謂成肅自嬪御冊立也。語聞。成肅及壽皇皆大怒。有意廢之。史太師已老。嘗詔入見北宮。密與謀。浩以爲不可。遂已。宮省事祕。莫得詳也。其後益無忌憚。貴妃黃氏有寵。后妬。每欲殺之。紹興二年。光宗初郊。宿青城齋宮。后乘便遂眞之死地。或以聞。上駭且忿怒。於是遂得心疾。及上不豫。兩宮有間言。天下寒心。皆歸過於后。后以慶元庚申上仙。權殯赤山。甫畢。雷震山崩。亟復修治之。

道學

伊洛之學行於世。至乾道淳熙間盛矣。其能發明先賢旨意。邇流徂源。論著講解。卓然自爲一家者。惟廣漢張氏敬夫。東萊呂氏伯恭。新安朱氏元晦而已。朱公尤淵洽精詣。蓋其以至高之才。至博之學。而一切

收斂歸諸義理。其上極於性命天人之妙。而下至於訓詁名數之末。未嘗舉一而廢一。蓋孔孟之道。至伊洛而始得其傳。而伊洛之學。至諸公而始無餘蘊。必若是。然後可以言道學也已。此外有橫浦張氏子韶。象山陸氏子靜。亦皆以其學傳授。而張嘗參宗杲禪。陸又嘗參杲之徒德光。故其學往往流於異端。而不自知。程子所謂今之異端。因其高明者也。至於永嘉諸公。則以詞章議論馳騁。固已不可同日語也。世又有一種淺陋之士。自視無堪。以爲進取之地。輒亦自附於道學之名。衰衣博帶。危坐闊步。或抄節語錄。以資高談。或閉眉合眼。號爲默識。而扣擊其所學。則於古今無所聞知。考驗其所行。則於義利無所分別。此聖門之大罪人。吾道之大不幸。而遂使小人得以藉口爲僞學之目。而君子受玉石俱焚之禍者也。韓侂胄用事。遂逐趙忠定。凡不附己者。指爲道學。盡逐之。已而自知道學二字本非不美。於是更目之爲僞學。臣僚之薦舉。進士之結保。皆有如是僞學者。甘伏朝典之辭。一時嗜利無恥之徒。雖嘗自附於道學之名者。往往旋易衣冠。強習歌鼓。欲以自別。甚者鄧友龍輩。附會迎合。首啓兵釁。而向之得罪於慶元初者。亦從而和之。可嘆也已。

鄧友龍開邊

鄧友龍。長沙人。嘗從張南軒游。自詭道學。既登朝。時論方攻僞學。因諱而晦其事。時外祖章文莊公爲學官。喜滑稽。嘗以祀事同齋宿談譴之際。友龍不能堪。以語及之。云章戲之曰。若然。則又是道學矣。友龍面發赤。大銜之。未幾入臺。章公由學士院補外。公本謝丞相客也。會友龍爲右史。而宇文紹節自右史代。

之。於是召文莊爲宗政少卿。友龍不能平。以喉紹節。紹節甫供職。未及受告。首論其事。語侵謝。蓋亦以見厭於韓矣。章命旣寢。謝遂去國。而友龍亦出爲淮西漕。日夕謀復入。時金人方困於北兵。且其國歲荐飢。於是沿邊不逞之徒。號爲跳河子者。時時剽獵事狀。陳說利害。友龍得之。以爲奇貨。於是獻之於韓。韓用事久。思釣奇立功。以自蓋。得之大喜。附而和者。雖不一。其端實友龍發之也。孔子所以畏鄙夫。患得患失者。有以夫。

文莊論安丙矯詔

安丙之誅吳曦也。矯詔自稱宣撫副使。遂徑入銜上奏。時章文莊直學士院。因謂矯制假命。一時權宜濟事可也。事定奏功。便當退用初銜。而遽稱所假。是豈復有朝廷乎。今爲朝廷計。宜先赦其矯詔之罪。然後賞其斬曦之功。則恩威並用。折衝萬里之外矣。而時相方自以爲功。謂此詔非矯。實朝廷密旨。且詣御樓受俘。於是疏不果上。已而受俘之議雖格。而竟以所矯官職授之。其後丙亦自斃。否則又一曦也。

王沈趨張說

張說之爲承旨也。朝士多趨之。王質景文。沈瀛子壽。始俱在學校有聲。旣而俱立朝。物譽亦歸之。相與言。吾儕當以詣說爲戒。衆皆聞其說而壯之。已而質潛往說所。甫入客位。而瀛已先在焉。相視愕然。明日喧傳。清議鄙之久皆不安而去。

協韻牽強

詩辭固多協韻。晦庵用吳才老補音多通。然亦有太甚者。古人但隨聲取協。方言又多不同。至沈約以來。方有四聲之拘耳。然亦正不必牽強也。離騷一經。惟多艱多替之句。最爲不協。孫辛老蘇子容本云。古亦應協。未必然也。晦庵以艱音巾。替音大。雖用才老之說。然恐無此理。以余觀之。若移長太息以掩涕一句。在哀生民之多艱下。則涕與替正協。不勞牽強也。

沈君與

吳興東林沈偕君與。卽東老之子也。家饒於財。少游京師。入上庠。好狎游。時蔡奴聲價甲於都下。沈欲訪之。乃呼一賣珠人於其門首。茶肆中議價。再三不售。撒其珠於屋上。賣珠者窘甚。君與笑曰。第隨我來。依汝所索還錢。蔡於簾中窺見。令取視之。珠也大驚。惟恐其不來。後數日乃詣之。其家喜相報曰。前日撒珠郎至矣。接之甚至。自是常往來。一日攜上樊樓。樓乃京師酒肆之甲。飲徒常千餘人。沈遍語在坐。皆令極量盡歡。至夜盡爲還所直而去。於是豪侈之聲滿三輔。旣而擢第。盡買國子監書以歸。時賈收耘老隱居茗城南橫塘上。沈嘗以詩遺之。蟹曰。黃稭稻熟墜西風。肥入江南十月雄。橫跪蹣跚鉗齒白。圓臍吸脇斗膏紅。蠶須園老香研柚。羹藉庖丁細壁蔥。分寄橫塘溪上客。持螯莫放酒杯空。耘老得之不樂曰。吾未之識。後進輟我。且聞其不羈。因和韻詆之云。彭越孫多伏下風。螭蟬奴視敢稱雄。江湖縱養膏腴紫。鼎鑊終烹爪眼紅。嘲稱吳兒牙似鍔。劈慚湖女手如蔥。獨憐盤內秋臍實。不比溪邊夏殼空。君與怒曰。吾聞賈多與郡將往還。預政言人短長。曾爲人所訟。吾以長上推之。乃鄙我若此。復用韻報之云。蟲腹無端苦動風。

團雌還却勝尖雄。水寒且弄雙鉗利。湯老難逃一背紅。液入幾家煩海瀟。醺成何處污園蔥。好收心躁潛蛇穴。毋使雷驚族類空。賈晚娶眞氏。人謂賈秀才娶眞縣君以爲笑。沈所指團雌爲此。賈尋悔之。而戲語已傳播矣。

吳侗

吳侗字公度。吳興人。試補太學爲第一。崇寧五年。羣禮部七千之士而魁之。其名聲風采。人莫不求識面而願交。遽經學妙語言。爲時聞人。其父伯陽嘗夢若遊奕使者立東階。問秀才在否。曰不在。遂去。出門見旌旛容物。彌望不絕。曰秀才歸。但道天赦曾來。已而捷音至。先以名次高下商價。自榜尾行間前列以至首選。自百千漸至千緡。乃出其榜。初自刪定。勅令所出爲寧海推官。時蔡京罷相。居城中。意其生計從容。委買雪川土物無虛月。侗意不平。念吾以文學起身。而不以儒者見遇。報以實直。京覺之而怒。重和二年。召爲九域圖志所編修官。時京以太師魯公賜第京師。朝朔望。一日上問京卿曩居杭。識推官吳侗乎。今以大臣薦。欲除官。對曰識之。其人傲狠無上。上驚曰何以知之。曰吾（按當作吳）知陛下御諱而不肯改。乃以一圈圍之。蓋言侗字也。上默然不懌。未幾言者承風旨論罷。自是不復出。及京敗。知鄆州孫囊言巴人有草祭之謠。上其事。甚者論其卽倉爲宅。拆倉字爲人君二字。謂京有不臣之心。雖若附會。然亦平日好以字畫中傷善類之報也。

御宴煙火

穆陵初年。嘗於上元日。清燕殿排當。恭請恭聖太后。既而燒火煙於庭。有所謂地老鼠者。徑至大母聖座下。大母爲之驚惶。拂衣徑起。意頗疑怒。爲之罷宴。穆陵恐甚。不自安。遂將排辦巨璫。陳詢盡監繫聽命。黎明。穆陵至陳朝謝罪。且言內臣排辦不謹。取自行遣。恭聖笑曰。終不成他特地來驚我。想是誤耳。可以赦罪。於是子母如初焉。

朱芮殺龍

吳興鄞南朱教授。失其名嘗江行。舟人忽報小龍見。請禱之。朱出視之。小蛇也。以箸夾入沸湯中。蛇躍出自投於江。却行波面。盼朱再四。乃沒。有頃。片雲霹靂。爐霧蔽舟。既而舟上一竅如錢。朱已斃於舟中矣。又王村芮祭酒煜。按津逮本作燁初任仁和尉。長河堰有龍王廟。每祭則有小蛇出。或止香爐。或飲於杯。往來者謹事之。堰歲數壞。人以爲龍所爲。芮疲於修築之役。一日焚香設奠。蛇果出爐上。芮端笏數之曰。有功於民者。乃得祀。龍廟食於此。未嘗有功。而歲數壞堰。勞民之力。爲罪多矣。無功有罪。於國法當殺。卽舉笏擊之。應手碎。是夕宿於近地。疾風甚雨。大木盡拔。土人大恐。而芮處之自若。後卒爲名臣。其幸不幸也如此。

齊東野語卷十二

姜堯章自敘 單丙文附

番易布衣姜夔堯章出處備見張輯宗瑞所著白石小傳矣。近得其一書自述頗詳。可與前傳相表裏。云某早孤不振。幸不墜先人之緒業。少日奔走。凡世之所謂名公鉅儒。皆嘗受其知矣。內翰梁公於某爲鄉曲。愛其詩似唐人。謂長短句妙天下。樞使鄭公受口文。使坐上爲之。因擊節稱賞。參政范公以爲翰墨人品皆似晉宋之雅士。待制楊公以爲於文無所不工。甚似陸天隨。於是爲忘年友。復州蕭公世所謂千崑先生者也。以爲四十年作詩始得此友。待制朱公既愛其文。又愛其深是禮樂。丞相京公不獨稱其禮樂之書。又愛其駢儷之文。丞相謝公愛其樂書。使次子來謁焉。稼軒辛公深服其長短句如二卿。孫公從之。胡氏應期。江陵楊公。南州張公。金陵吳公。及吳德夫。項平甫。徐子淵。曾幼度。商輦仲。王晦叔。易彥章之徒。皆當世俊士。不可悉數。或愛其人。或愛其詩。或愛其文。或愛其字。或折節交之。若東州之士。則樓公大防。葉公正則。則尤所賞激者。嗟乎。四海之內。知己者不爲少矣。而未有能振之於窶困無聊之地者。舊所依倚。惟有張兄平甫。其人甚賢。十年相處。情甚骨肉。而某亦竭誠盡力。憂樂關念。平甫念其困躓場屋。至欲輸資以拜爵。某辭謝不願。又欲割錫山之膏腴以養其山林無用之身。惜乎平甫下世。今惘惘然若有所失。人生百年有幾。賓主如某與平甫者。復有幾。撫事感慨。不能爲懷。平甫既歿。稚子甚幼。入其門。則必爲